



სსიპ განათლების ხარისხის
განვითარების ეროვნული
ცენტრის დირექტორი

15/10/2025



MES 1 25 0001347950

ბრძანება

„ეროვნული კვალიფიკაციების ჩარჩოსა და სწავლის სფეროების კლასიფიკატორის დანერგვისა და განვითარების მიზნით მრჩეველთა საბჭოს შექმნისა და საქმიანობის წესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2021 წლის 25 თებერვლის №163567 ბრძანებაში ცვლილების შეტანის თაობაზე

საქართველოს ზოგადი ადმინისტრაციული კოდექსის 63-ე მუხლისა და საქართველოს განათლებისა და მეცნიერების მინისტრის 2010 წლის 14 სექტემბრის №89/ნ ბრძანებით დამტკიცებული „საჯარო სამართლის იურიდიული პირის - განათლების ხარისხის განვითარების ეროვნული ცენტრის დებულების“ მე-5 მუხლის პირველი პუნქტის „ნ“ ქვეპუნქტის საფუძველზე, სსიპ - განათლების ხარისხის განვითარების ეროვნული ცენტრის (შემდგომ - ცენტრი) კვალიფიკაციების განვითარების სამსახურის უფროსის 2025 წლის 01 ოქტომბრის №1266233 სამსახურებრივი ბარათის გათვალისწინებით

გბრძანებ :

1. შეტანილ იქნეს ცვლილება „ეროვნული კვალიფიკაციების ჩარჩოსა და სწავლის სფეროების კლასიფიკატორის დანერგვისა და განვითარების მიზნით მრჩეველთა საბჭოს შექმნისა და საქმიანობის წესის დამტკიცების შესახებ“ ცენტრის დირექტორის 2021 წლის 25 თებერვლის №163567 ბრძანებაში და ბრძანების პირველი პუნქტით დამტკიცებული ეროვნული კვალიფიკაციების ჩარჩოსა და სწავლის სფეროების კლასიფიკატორის დანერგვისა და განვითარების მიზნით მრჩეველთა საბჭოს შექმნისა და საქმიანობის წესი ჩამოყალიბდეს ამ ბრძანების დანართის შესაბამისად.
2. დაევალოს ცენტრის ადამიანური რესურსების მართვის და საქმისწარმოების სამსახურს ბრძანების დაინტერესებული პირებისათვის კანონმდებლობით დადგენილი წესით გაცნობის უზრუნველყოფა.
3. ბრძანება შეიძლება გასაჩივრდეს ქ. თბილისის საქალაქო სასამართლოში (მის.: ქ. თბილისი, დავით აღმაშენებლის ხეივანი №64) კანონმდებლობით დადგენილ ვადაში და წესით.

სსიპ-განათლების ხარისხის განვითარების ეროვნული
ცენტრის დირექტორის მოვალეობის შემსრულებელი

ქეთევან კობახიძე



ეროვნული კვალიფიკაციების ჩარჩოსა და სწავლის სფეროების კლასიფიკატორის დანერგვისა და განვითარების მიზნით მრჩეველთა საბჭოს შექმნისა და საქმიანობის წესი

მუხლი 1. რეგულირების სფერო

ეს წესი ადგენს საქართველოს განათლების, მეცნიერების, კულტურისა და სპორტის მინისტრის 2019 წლის 10 აპრილის №69/ნ ბრძანებით დამტკიცებული ეროვნული კვალიფიკაციების ჩარჩოსა (შემდგომ - ჩარჩო) და სწავლის სფეროების კლასიფიკატორის (შემდგომ - კლასიფიკატორი) დანერგვისა და განვითარების მიზნით მრჩეველთა საბჭოს (შემდგომ - მრჩეველთა საბჭო) შექმნისა და საქმიანობის წესს.

მუხლი 2. მრჩეველთა საბჭოს საქმიანობის მიზნები

1. მრჩეველთა საბჭო წარმოადგენს ჩარჩოსა და კლასიფიკატორის დანერგვისა და განვითარების პროცესებში ყველა დაინტერესებული მხარის ჩართულობის უზრუნველყოფის მიზნით შექმნილ სსიპ - განათლების ხარისხის განვითარების ეროვნული ცენტრის (შემდგომ - ცენტრი) დირექტორის საკონსულტაციო კოლეგიურ ორგანოს.
2. მრჩეველთა საბჭოს საქმიანობის მიზანია ჩარჩოსა და კლასიფიკატორის დანერგვისა და განვითარების მიზნით შესაბამისი რეკომენდაციების შემუშავება და ცენტრის დირექტორისთვის წარდგენა.

მუხლი 3. მრჩეველთა საბჭოს ფუნქციები

მრჩეველთა საბჭოს ფუნქციებია:

- ა) ჩარჩოსა და კლასიფიკატორის დანერგვასა და განვითარებასთან დაკავშირებული ცენტრის სტრატეგიული მიზნებისა და ამოცანების განსაზღვრის მიზნით რეკომენდაციების შემუშავება;
- ბ) ჩარჩოსა და კლასიფიკატორის დანერგვასა და განვითარებასთან დაკავშირებით, ცენტრის წლიური სამოქმედო გეგმის აქტივობების განსაზღვრასთან დაკავშირებით რეკომენდაციების შემუშავება;
- გ) ჩარჩოსა და კლასიფიკატორის დანერგვისა და განვითარების სტრატეგიული და სამოქმედო გეგმების შესრულების ანგარიშის განხილვა და შესაბამისი რეკომენდაციების შემუშავება;

- დ) ჩარჩოსა და კლასიფიკატორის დანერგვისა და განვითარების შესახებ მონიტორინგის გეგმის ანგარიშის განხილვა და შესაბამისი რეკომენდაციების შემუშავება;
- ე) ჩარჩოსა და კლასიფიკატორის დანერგვისა და განვითარებასთან დაკავშირებული მეთოდური სახელმძღვანელო დოკუმენტების განხილვა და შესაბამისი რეკომენდაციების შემუშავება;
- ვ) კვალიფიკაციების ელექტრონული რეესტრის ფუნქციონირების ყოველწლიური ანგარიშის განხილვა და შესაბამისი რეკომენდაციების შემუშავება;
- ზ) ჩარჩოსა და კლასიფიკატორის დანერგვისა და განვითარების შესახებ დაინტერესებული მხარეების ინფორმირების გაზრდის მიზნით შესაბამისი რეკომენდაციების შემუშავება;
- თ) ჩარჩოსა და კლასიფიკატორის დანერგვისა და განვითარების მიზნით, სხვა საკითხების განხილვა და შესაბამისი რეკომენდაციების მომზადება.

მუხლი 4. მრჩეველთა საბჭოს შემადგენლობა და ფორმირების წესი

1. მრჩეველთა საბჭოს წევრებს 6 წლის ვადით ნიშნავს ცენტრის დირექტორი ინდივიდუალური ადმინისტრაციულ-სამართლებრივი აქტით.
2. მრჩეველთა საბჭოს შემადგენლობაში შესაძლოა შედიოდნენ:
 - ა) საქართველოს განათლების, მეცნიერებისა და ახალგაზრდობის სამინისტროს მიერ წარდგენილი პირი/პირები;
 - ბ) საქართველოს განათლების, მეცნიერებისა და ახალგაზრდობის სამინისტროს სისტემაში შემავალი საჯარო სამართლის იურიდიული პირების მიერ წარდგენილი პირი/პირები;
 - გ) საქართველოს ეკონომიკისა და მდგრადი განვითარების სამინისტროს მიერ წარდგენილი პირი;
 - დ) საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროს მიერ წარდგენილი პირი;
 - ე) ცენტრის მიერ წარდგენილი პირი/პირები, გარდა დირექტორის და დირექტორის მოადგილისა;
 - ვ) სსიპ - საქართველოს სავაჭრო-სამრეწველო პალატის მიერ წარდგენილი პირი;
 - ზ) საჯარო სამართლის იურიდიული პირის ფორმითა და კერძო სამართლის იურიდიული პირის ფორმით დაფუძნებული საგანმანათლებლო დაწესებულების წარმომადგენელი/წარმომადგენლები;
 - თ) განათლების მიმართულებით მომუშავე პროფესიული ასოციაციის ან/და გაერთიანების წარმომადგენელი/წარმომადგენლები;
 - ი) განათლების მიმართულებით მომუშავე სამოქალაქო (არასამთავრობო) სექტორის წარმომადგენელი/წარმომადგენლები;
 - კ) ა(ა)იპ - საქართველოს სტუდენტური ორგანიზაციების ასოციაციის მიერ წარდგენილი პირი.

3. მრჩეველთა საბჭოს წევრობის კანდიდატების წარდგენა ამ მუხლის მე-2 პუნქტით გათვალისწინებული ორგანიზაციების მიერ ხორციელდება ცენტრის წერილობითი მიმართვის საფუძველზე, გარდა ამ მუხლის მე-4 პუნქტით განსაზღვრული შემთხვევისა. წერილობითი მიმართვა ხორციელდება მხოლოდ იმ უმაღლეს და პროფესიულ საგანმანათლებლო დაწესებულებებთან, რომელთა პროგრამები ფარავს კლასიფიკატორით განსაზღვრულ ყველაზე მეტ სწავლის სფეროს.
4. ცენტრის წარმომადგენლებს, მათთან შეთანხმებით, წარადგენს ცენტრის კვალიფიკაციების განვითარების სამსახური.
5. საგანმანათლებლო დაწესებულების მიერ ერთზე მეტი კანდიდატის წარდგენის შემთხვევაში მრჩეველთა საბჭოს წევრად შესაძლოა შეირჩენ კანდიდატები შემდეგი პრიორიტეტულობით:
- ა) კანდიდატი, რომელიც წარდგენილია ყველაზე მეტი დაწესებულების მიერ ერთდროულად;
 - ბ) კანდიდატი, რომელიც აკმაყოფილებს ამ მუხლის მე-8 პუნქტით განსაზღვრულ ყველაზე მეტ მოთხოვნას.
6. მრჩეველთა საბჭოს სხდომაზე სათათბირო ხმის უფლებით (გადაწყვეტილების მიღებაზე ხმის უფლების გარეშე) ასევე შეიძლება მოწვეულ იქნენ ადგილობრივი ან/და საერთაშორისო სპეციალისტები/ექსპერტები და სხვა პირები, რომელთა ცოდნა და გამოცდილება მნიშვნელოვანი იქნება ჩარჩოსა და კლასიფიკატორის განვითარებისათვის.
7. ამ მუხლის მე-2 პუნქტში მითითებული ორგანიზაციების მიერ წარმოდგენილ კანდიდატებთან დაკავშირებით მრჩეველთა საბჭოში შეყვანის თაობაზე გადაწყვეტილებას იღებს ცენტრის დირექტორი. ამასთან, ცენტრის დირექტორის ინდივიდუალურ ადმინისტრაციულ-სამართლებრივი აქტით განისაზღვრება მრჩეველთა საბჭოს თავმჯდომარე.
8. ამ მუხლის მე-2 პუნქტში მითითებული ორგანიზაციების მიერ წარმოდგენილი მრჩეველთა საბჭოს წევრობის კანდიდატები, სასურველია, აკმაყოფილებდნენ არანაკლებ ორ მოთხოვნას:
- ა) მაგისტრის ან დოქტორის ან მათთან გათანაბრებული აკადემიური ხარისხი;
 - ბ) მუშაობის არანაკლებ 5 წლიანი გამოცდილება;
 - გ) ჩარჩოსა და კლასიფიკატორის ან/და საგანმანათლებლო პროგრამის ან/და პროფესიული საგანმანათლებლო სტანდარტის ან/და დარგობრივი მახასიათებლის ან/და ეროვნული სასწავლო გეგმის შემუშავებისა და განვითარების პროცესებში მონაწილეობა.
9. მრჩეველთა საბჭოს წევრს, ცენტრის დირექტორის ინდივიდუალური ადმინისტრაციულ-სამართლებრივი აქტით შეიძლება უფლებამოსილება ვადამდე შეუწყდეს შემდეგ შემთხვევებში:
- ა) პირადი განცხადების ან წარმდგენი დაწესებულების წერილობითი მომართვის საფუძველზე;
 - ბ) მის მიმართ სასამართლოს მიერ გამოტანილი გამამტყუნებელი განაჩენის კანონიერ ძალაში შესვლისას;

- გ) სასამართლოს მიერ შეზღუდულქმედუნარიანად აღიარების ან მხარდაჭერის მიმღებად ცნობის შემთხვევაში, თუ სასამართლოს გადაწყვეტილებით სხვა რამ არ არის განსაზღვრული;
- დ) სხდომებზე ზედიზედ სამჯერ გამოუცხადებლობის შემთხვევაში, რაც აფერხებს მრჩეველთა საბჭოს მუშაობას;
- ე) იმ ორგანიზაციაში თანამშრომლის სტატუსის შეწყვეტის შემთხვევაში, რომლის მიერაც არის წარდგენილი საბჭოს წევრად. გარდა იმ შემთხვევისა, როდესაც კანდიდატი წარმოდგენილია ერთდროულად რამდენიმე საგანმანათლებლო დაწესებულების მიერ, საბჭოს წევრი ვალდებულია წერილობით აცნობოს ცენტრს აღნიშნული გარემოების შესახებ ამ გარემოების დადგომიდან 10 სამუშაო დღის ვადაში;
- ვ) წარმდგენი საგანმანათლებლო დაწესებულების მიერ საგანმანათლებლო დაწესებულების სტატუსის დაკარგვის შემთხვევაში, გარდა იმ შემთხვევისა, როდესაც კანდიდატი წარდგენილია ერთდროულად რამდენიმე საგანმანათლებლო დაწესებულების მიერ.
10. ამ წესის მე-9 პუნქტით განსაზღვრული გარემოებ(ებ)ის დადგომის შემთხვევაში, წარმდგენი ორგანიზაციისთვის ცენტრის წერილობითი მიმართვის საფუძველზე ხორციელდება მრჩეველთა საბჭოში აღნიშნული პირის ჩანაცვლება. ცენტრის წარმომადგენლ(ებ)ს ჩანაცვლების მიზნით წარადგენს კვალიფიკაციების განვითარების სამსახური.

მუხლი 5. მრჩეველთა საბჭოს საქმიანობის წესი

1. მრჩეველთა საბჭოს სხდომები ტარდება წელიწადში არანაკლებ ორჯერ.
2. მრჩეველთა საბჭოს ხელმძღვანელობს მრჩეველთა საბჭოს თავმჯდომარე. თავმჯდომარის არყოფნის შემთხვევაში მის მოვალეობას ასრულებს სხდომაზე საბჭოს წევრების დამსწრეთა უმრავლესობით არჩეული საბჭოს ერთ-ერთი წევრი.
3. მრჩეველთა საბჭოს წევრი უფლებამოსილია სხდომაში მონაწილეობა მიიღოს ელექტრონული კომუნიკაციის საშუალებით. ამასთან, საბჭოს სხდომა შესაძლებელია განხორციელდეს სრულად დისტანციურად, კომუნიკაციის თანამედროვე ელექტრონული საშუალებების გამოყენებით.
4. მრჩეველთა საბჭო უფლებამოსილია, თუ სხდომას ესწრება საბჭოს სიითი შემადგენლობის ნახევარზე მეტი.
5. მრჩეველთა საბჭოს სხდომაზე ხმის მიცემა წარმოებს ღია კენჭისყრით. მრჩეველთა საბჭოს თითოეულ წევრს აქვს ერთი ხმის უფლება.
6. მრჩეველთა საბჭო გადაწყვეტილებას იღებს დამსწრეთა უმრავლესობით. ხმათა თანაბრად გაყოფის შემთხვევაში გადაწყვეტია მრჩეველთა საბჭოს თავმჯდომარის ხმა.
7. მრჩეველთა საბჭოს წევრს არ აქვს ხმის მიცემისგან თავის შეკავების უფლება.
8. საბჭოს მიერ მიღებული გადაწყვეტილებები აისახება სხდომის ოქმში.
9. მრჩეველთა საბჭოს გადაწყვეტილებები ფორმდება ოქმით, რომელიც შეთანხმებულია საბჭოს წევრებთან. საბჭოს სხდომის ოქმი სხდომის თავმჯდომარისა და ოქმის მწარმოებლის მიერ ამ წესის

დანართი №1-ით დამტკიცებულ წერილობითი დასტურის შევსებულ ფორმასთან ერთად იგზავნება ცენტრის კვალიფიკაციების განვითარების სამსახურის ოფიციალურ ელ. ფოსტის მისამართზე: gnqf@eqe.ge. ცენტრის კვალიფიკაციების განვითარების სამსახურის შესაბამისი უფლებამოსილი თანამშრომელი უზრუნველყოფს აღნიშნული დასტურის წერილების დართვას ოქმზე.

10. მრჩეველთა საბჭოს სხდომის ოქმს ცენტრის კვალიფიკაციების განვითარების სამსახური ცენტრის დირექტორს წარუდგენს სხდომის ჩატარებიდან 15 სამუშაო დღის ვადაში.

11. მრჩეველთა საბჭოს წევრები ვალდებული არიან მონაწილეობა მიიღონ საბჭოს მუშაობაში და დაიცვან „პერსონალურ მონაცემთა დაცვის შესახებ“ საქართველოს კანონით, ასევე „სახელმწიფო საიდუმლოების შესახებ“ საქართველოს კანონით განსაზღვრული მოთხოვნები.

12. მრჩეველთა საბჭოს წევრი საკუთარი ფუნქციების შესრულებისას უნდა იყოს დამოუკიდებელი, ობიექტური, მიუკერძოებელი და უნდა იცავდეს კოლეგიალურობისა და საყოველთაოდ აღიარებულ ეთიკის პრინციპებს.

13. მრჩეველთა საბჭოს მუშაობის ორგანიზაციულ-ადმინისტრაციულ მხარდაჭერას ახორციელებს ცენტრის კვალიფიკაციების განვითარების სამსახური, რომელიც საბჭოს წევრებს სხდომის გამართვამდე არაუგვიანეს 10 კალენდარული დღით ადრე უგზავნის სხდომის დღის წესრიგს და შესაბამის დოკუმენტაციას. საბჭოს წევრი უფლებამოსილია მოითხოვოს დამატებითი დოკუმენტაცია საკითხის უკეთ შესწავლის მიზნით, რის თაობაზეც საბჭოს წევრმა უნდა აცნობოს ცენტრს სხდომის გამართვამდე არაუგვიანეს 5 დღით ადრე. ცენტრი ვალდებულია მოთხოვნილი დოკუმენტაცია გაუგზავნოს საბჭოს წევრებს საბჭოს გამართვამდე არანაკლებ 3 დღით ადრე.

14. სხდომის გამართვამდე საბჭოს თითოეული წევრი ვალდებულია წინასწარ შეისწავლოს ამ მუხლის მე-12 პუნქტით განსაზღვრული დოკუმენტაცია.

**საბჭოს სხდომის ოქმზე საბჭოს თავმჯდომარისა და ოქმის მწარმოებლის წერილობითი დასტურის
ფორმა**

სსიპ - განათლების ხარისხის განვითარების ეროვნული ცენტრის დირექტორის 20-- წლის N-----
ბრძანებით დამტკიცებული (მიუთითეთ საბჭოს დასახელება) საბჭოს თავმჯდომარე, ოქმის
მწარმოებელი (თავმჯდომარის, ოქმის მწარმოებლის სახელი და გვარი) ვადასტურებ, რომ
ვეთანხმები საბჭოს № (მიუთითეთ სხდომის ნომერი) სხდომის, № (მიუთითეთ ოქმის ნომერი)
ოქმის შინაარსს.

სახელი, გვარი

თარიღი